

von Wulf Wager

Schuh-Fetischishta



Also manche Leut wissat doch wirklich net, wo 's 'n fehlt. Wenn i mir ibrleg, dass meine Eltra no nach dem Kriag g'hongrat hend, no ka mr sich net wirklich vorstellen, dass es Studenta geit, dia a Woch Urlaub nemmat ond en dr Königstroß (!) en Stuegert vor ama Schuahlada campierat, bloß damit se ois von höggschdens fuchzig Päärle Schuah für 350,- Euro kaufa kennat.

Do goht's om an Schuah, den en amerikanischer Rapper entworfa hot. Onda ond enna komplett aus Plaschtik. Ond dodrfir 350,- Euro ausgeba. Also, i woiß au et. Jetzt han i amol im Internet a bissle recherchiert. Im Ebay geit's dia Schuah jetzt scho om 2 bis 2500 Euro. Des isch nadierlich koi schlecht's Gschäft. Aber des isch no garnix: Ha jeroms, ond do geit's Leut, dia für an alda Turnschuah "Adidas Jordan 2" bis zu 10.000,- Euro zahlat. Jonger Vaddr, lebat mir en ra dekadenta Welt.

I han au no a Päärle alde Turnschuha aus meira Schulzeit - guade 40 Jahr alt. I glaub, dia stell i amol uf Ebay ei, vielleicht krieg i au 10.000 Eurna drfier. No kennt i mir jo au so a Päärle amerikanische Rapperschuah für 350,- Euro kaufa. Aber uf dr Königstroße campiera, des dät i net. Do dät i mir no en Studenta a'heura...

Bis näggschd Woch'

Ihr

Wulf Wager